



Publicaziuns officialas dils 23-10-2009

Affittaziun tegias d'alp

Conform agl art. 29 alinea 4 dalla lescha davart beins e dretgs immobiliars, lai la vischnaunca da Sumvitg vi las suandontas tegias per ina nova perioda da diesch onns ch'entscheiva culs 01-01-2010 e cuoza entochen ils 31-12-2019:

Tegia Crap Ner
Tegia Glivers Dadens Su
Tegia veglia Glivers Dadens Sut ¹⁾
Truaisch Alp Glivers Dado Sut
Truaisch Alp Naustgel
Stalla Alp Vallesa Sut, stanza su
Stalla Alp Vallesa Sut, stanza sut
Tegia Alp Rentiert Davon
Tegia Alp Rentiert Dadens
Tegia Alp Gargialetsch Davon
Tegia Stavel Crap
Tegia Fontaunas Cugn
Tegia Alp Cugn Sut
Tegia Fecler Pign
Tegia nova Alp Carpet Miez
Tegia mises Runé
Tegia Alp da cauras Val Tenigia

1) *vegn schada vi entochen tier la realisaziun dil project d'agroturissem "Crap Ner"*

Interessents veglien inoltrar lur annunzia cul formular official a scret entochen sil pli tard ils **13-11-2009** cun posta A (bul postal) ni dar giu sin canzlia communal.

La gliesta dallas tegias cun las indicaziuns dils tscheins da locaziun, il fegl d'informaziun cun tuttas indicaziuns pertuccont la procedura e las cundiziuns d'affittaziun sco era il formular d'annunzia official san vegnir retratgas sin canzlia communal ni cargadas giu digl internet sut www.sumvitg.ch.

Curdem da gronda dimensiun

La vischnaunca organischescha ina rimnada da rufid bloccont sco suonda:

Venderdis, ils 23 d'october 2009 dallas 08.00 - 18.00 uras

NIEV vegn rimnau il rufid per l'entira vischnaunca sin la piazza Igniu (sper baghetg stradal)

La rimnada ha liug mintgamai mo 1 di, persuerter inaga dapli per onn!

Aschia sto il rufid buca vegnir tenius si aschi ditg a casa.

Ils curdems ein da deponer els containers ni navettas tschentai sil plaz. Per tener-casa vegn priu encunter **max. 2 m³** rumians. Quantitads pli grondas, per ex. ord rumidas da casas e clavaus ein da transportar directamein e sin cuost dil caschunader ella deponia regionala a Rueun.

Ei vegn acceptau

- maschinas pintgas e mopeds mo cun tratg giu ieli e benzin
- ferramenta electronica e maschinas da lavar
- mobílias ed indrezs da casa
- ulteriurs curdems che vegnan buca rimnai cun ils transports jamnils
- per pneus senza gavegl vegn incassau ina taxa da frs. 5.--, cun gavegl frs. 10.--

Buca acceptau vegnan

- maschinas agricolas
- lenna da brisch
- curdems da baghetg (Bauschutt) e curdems da fatschentas, quels ein da transportar directamein a Rueun
- curdem verd da curtin e caglias, tals curdems san vegnir deponi sil plaz da rimnada ad Igniu
- calzera da skis san vegnir dai giu a sgr. Ernst Orlik a Rabius per frs. 5.--, en favur dalla ARGO Tavau
- cartun e pupi duei vegnir surdau alla rimnada entras la scolas resp. las uniuns
- blachas da ballas da silo (verdas ed alvas)

Nus appelein alla responsabladad da vischinas e vischins e supplichein da setener vid quell'ordinaziun en favur digl ambient. Medemamein fagein nus attents da buca deponer rumians sin deponias illegalas (selvadias). Talas deponias cunterfan alla legislaziun per la dismessa da rumians e vegnan annunziadas als organs responsabels.

7175 Sumvitg, 23-10-2009

Departament d'ambient

Rumida da neiv 2009 / 2010

La vischnaunca exequescha era uonn puspei sin incarica la rumida da neiv per privats. L'indemnisaziun per quella lavur corrispunda allas cundiziuns che l'industria privata pretenda. Plinavon sto quella dismessa da neiv star anavos en prioritad alla rumida dils implonts publics d'avertura. Sche pusseivel duei l'incarica vegnir surdada alla vischnaunca mo leu nua che quella procura era la dismessa dallas vias cunfinontas. Vischinas e vischins che vulan schar exequir la vischnaunca la rumida da neiv da lur vias e parcadis privats duront gl'unviern proxim ein supplichai d'annunziar quei a scret u per telefon entochen ils **31 d'october 2009** al cau dil menaschi stradal (tel. 081 936 30 79 ni 079 638 18 19).

Sumvitg, 23-10-2009

Departament stradal

Rimnada da pupi

Nus rimnein pupi e cartun, **venderdis ils 6 da november 2009**. La rimnada a Sumvitg, Cumpadials, Surrein e Rabijs (cun uclauns) vegn fatga dallas scolas dalla vischnaunca. La scola da Sumvitg rimna gia il avonmiezdi; Rabijs e Surrein rimnan il suentermiezdi. Ils rimnaders supplicheschan da ligiar il pupi ed il cartun separat e bein. Per Vossas breigias engrazian ils responsabels gia ordavon.

Sumvitg, 23-10-2009

Scolas dalla vischnaunca da Sumvitg

Donaziun fundaziun Greina

Sefundond sin art. 5 dil reglament pertuccont diever dalla donaziun fundaziun svizra per la tgira dalla cuntrada ston damondas per ina contribuziun vid in project vegnir inoltradas alla cumissiun Greina entochen ils **30 da november** digl onn precedent cul formular corrispundent. Nus supplichein per notizia da quest avis.

Sumvitg, 23-10-2009

Cumissiun Greina

Uniuns da dunnas dalla vischnaunca da Sumvitg

Nus menein atras il suandont cuors: **Cussegliaziun da stil – Stilberatung**

Menadra: Annagreth Walter

Liug: Casa da scola Rabijs

Temps: 1 1/2 ura per persuna vegn fatg individual suenter las annunzias

Datum: **Venderdis, ils 30 d'october 2009 e sonda, ils 31 d'october 2009**

Nus spitgein Tia annunzia entochen **mardis, ils 27 d'october 2009**. Annunzias per l'entiera vischnaunca da Sumvitg: Jasmine Cajacob, tel. 081 943 15 04. Adatg! Ils plaz ein limitai.

Uniun da catschadurs Greina, Sumvitg

www.catschadurs-greina.ch

Invitaziun alla tgira d'atun sonda, ils 31 d'october 2009 dallas 7.30–13.00 uras. Nus serimnein allas 7.30 uras vi Sumvitg sil plaz scola. Nus selegrein da seveser cun Tei a caschun da nossa tgira d'atun! Cordialmein envida per la suprastonza *il president: Roland Tschuor*

Uniun sportiva Rabijs

Gimnastica per carschi a Rabijs

Sut nies motto «in saun spért en in saun tgierp» organisein nus puspei la gimnastica per giuven ed ils restai giuven. **Umens e dunnas** naven da 16 entochen 99 onns che han plascher da semover e separticipar activamein en sports polivalents ein cordialmein envidai, naven dils 28 d'october 2009 mintgamai la mesjamna naven dallas 20.00. Prendei la pusseivladad da guder ina purschida cheu el vitg.

Liug: sala da gimnastica Rabijs

Segirada: ei caussa da mintgin

Cordialmein envida *Uniun sportiva Rabijs: il comite*

Uniun sportiva Rabius: Gimnastica d'affons

L'uniun sportiva Rabius USB organisescha puspei la gimnastica per ils affons. Els han la pusseivladad da s'occupar sin ina moda prudenta el vitg. Buobs e buobas che han plascher dil sport e da semover activamein en modas polisportivas ein cordialmein envidai. **L'emprema tochen e cun la quarta classa** serimnan naven dils 28 d'october 2009 mintgamai la mesjamna naven dallas **17.00 tochen las 18.00** en sala da gimnastica a Rabius.

Menadras: Iris Deplazes ed Anja Cabalzar.

La 5avla tochen la 9avla classa entscheivan ils 28 d'october mintgamai la mesjamna naven dallas **18.45 tochen las 19.55**. Affons dalla vischnaunca Sumvitg naven dalla 5avla classa astgan era far part!

Menaders: Ursin Bearth e Renato Monn. Impurtont: **segirada ei caussa da mintgin!**

Resti da gimnastica e calzera da halla cun sola clara. Per ulteriuras damondas stein bugen a disposiziun, tel. 081 936 30 66. En num dall'uniun sportiva Rabius USB selegnan *ils menaders: Iris, Anja, Ursin e Renato*

14. fiera d'atun a Rabius

La fiera d'atun ha liug uonn a Rabius **sonda, ils 24 d'october naven dallas 10.00–16.00**. Ei vegn purschiu products agricols, pettas e tustgets, decoraziuns, entagls en lenn e lavurs manilas. Ustria sil plaz, caschun da gentar. Cordialmein envida *l'uniun purila Sumvitg ed expositurs*

Referat per geniturs ed educaturs

tier la tematica: **Diever da medias da massa d'affons e giuvenils: influenzas e rescas**. Tgei influenzas, tgei aspects positivs e negativs ha il diever dils mieds da massa sil svilup d'affons e giuvenils? Co san geniturs ed educaturs reagir sin basegns e giavischs da lur affons? Tgei libertads e tgei cunfins ein adattai? Il referat ha liug **mesjamna, ils 4 da november 2009** allas 20.00 uras en casa da scola a Sumvitg culs referents dr. Felix Böhringer e Silvana Calanchina, responsabels pil survetg psichiatric da giuvenils cantunal. Cordialmein envidan la menadra ed il menader dallas vischnauncas da Sumvitg e da Trun

Museum Regiunal Surselva

Il Museum Regiunal Surselva envida cordialmein tier: Historia(s) en plaid e maletg/tema «alp» **Mardis, ils 27 d'october 2009, 20.00 uras, sala dalla casa da scola veglia a Cumpadials**

Prelecziun: Arno Camenisch ord il cudisch «Sez ner».

Film: (30 min.) Alp Naustgel, 1982/83 e 2001 da Meinrad Bearth

Hosp: Sep Benedetg Candinas, cautegia alp Naustgel

Moderaziun: Alexi Nay, cussegl da fundaziun MRS

Entrada: frs. 7.–/frs. 3.–

Silsuenter puschegn cun vin e caschiel organisau dalla cumissiun culturala e purs da Sumvitg.
www.museumregiunal.ch

Club da ballapei Trun/Rabius

Campionadi da ballapei

Mira sut Trun.

Biblioteca Trun

Mira Sut Trun

Biblioteca populara, Mustér

Mira sut Disentis/Mustér.